

Biblioteca Nacional ta presenta buki di autor Quito Nicolas esta "Tera di Silencio"

ORANJESTAD- mayan diaranson 4 di februari lo tuma luga presentacion di un novela di e conocido escritor-poeta Arubiano, Quiot Nicolaas. E novela aki ta na Papiamento y ta titula, "Tera di Silencio."

E novela ta trata di e hoben Rene, kende ta regresa su pais pa yuda construi un sociedad contemporaneo. Rene ta haya su pais den un situacion di decadencia y ta descubri e cambionan y e impacto cu esaki ta bin riba e cultura y relacion humano.

Su manera di pensa, ta producto di su educacion na cas, su formacion na Europa y orientacion humanista. Diferente acontecimiento, entre otro e asesinato di John F. Kennedy, a influencia e hoben su bida aki na edad di 8 aña.

E historia y cultura di su pais, apesar di ta adopta normanan universal, nunca el a ignora. Bou di palo den Santa Fe, Rene y su amigonan sa hunga e wega di e 'piedranan di suerte'. E figuranan geometrico cu esakinan tabata forma, tabata prognostica e suerte den bida. E cuestion di tereno den famia, tabata e motibo

cu Rene a Sali na interes di cunuceronan di Santa Fe.

E storia ta ser conta a base di e pensamiento y recuerdonan di Rene. Intercambia cu e bos di su mayornan, un mundo nobo ta ser descubri cual ta relata e pasado di e hoben aki. E diferencia entre realidad, ficcion y imaginacion ta mescos cu un liña fini cu ta resulta dificil pa gara den bo man.

E escritor mas bien ta conoci pa su tomonan di poesia na Papiamento y Hulandes pero tambe pa su storianan di Pasco.

Na Hulanda el a yega di declara den diferente teatro manera entre otro den Theater De Kubus, Cosmic Theatre, Off-Corso Theater y Theater de Bouwkunde.

Aña pasa el a actua durante e festival Winternachten na Den Haag pa un publico di miles di persona.

E presentacion lo tuma luga den Biblioteca Nacional na Oranjestad y lo cuminza pa 8'or di anochi. Despues di e presentacion e auto lo firma su buki pa interesadonan y tambe por combersa cu su persona.